



SAOPĆENJE ZA ŠTAMPU

Obavljeno 7. oktobra 2003.

- 2 stranice -

IZJAVA DOMA ZA LJUDSKA PRAVA O KRAJU NJEGOVOG MANDATA I IZMJENAMA U PROCEDURI TOKOM POSLJEDNJA TRI MJESECA NJEGOVOG RADA

I Kraj mandata Doma za ljudska prava

Tri Strane potpisnice Sporazuma o ljudskim pravima iz Aneksa 6, kojim je uspostavljen Dom za ljudska prava, tj. Bosna i Hercegovina, Federacija Bosne i Hercegovine i Republika Srpska, potpisale su "Sporazum u skladu sa članom XIV Aneksa 6 uz Opći okvirni sporazum za mir u Bosni i Hercegovini". Bosna i Hercegovina ga je potpisala 22. septembra 2003., a Federacija i Republika Srpska 25. septembra 2003. godine. Sporazum je stupio na snagu 25. septembra 2003. godine.

Prema ovom Sporazumu:

- mandat Doma za ljudska prava prestaje sa 31. decembrom 2003. godine.
- na dan 1. januara 2004. godine počinje sa radom Komisija za ljudska prava pri Ustavnom sudu Bosne i Hercegovine; ona će se sastojati od 5 sudaca Doma (tri državljanina BiH i dva strana državljanina).
- predmeti koje Dom primi u periodu od 1. oktobra – 31. decembra 2003. godine biće registrovani pod privremenim brojevima i rješavat će ih Komisija za ljudska prava; izuzetno, Dom će registrirati i odlučivati o svim zahtjevima za privremene mjere primljenim u gore navedenom periodu.
- Komisija za ljudska prava će raditi od 1. januara najkasnije do 31. decembra 2004. godine; ona ima nadležnost da odlučuje o predmetima registrovanim pred Domom za ljudska prava prije 1. oktobra 2003. godine, te onim registriranim pod privremenim brojevima u periodu od 1. oktobra do 31. decembra 2003. godine.
- Za one koji su podnijeli prijavu Domu prije 1. oktobra 2003. godine, predviđeno je da će o njihovoj prijavi odlučiti Dom do 31. decembra 2003. godine ili Komisija za ljudska prava u toku 2004. godine.
- Što se tiče prijava podnesenih u periodu od 1. oktobra do 31. decembra 2003. godine, predviđeno je da će o njima odlučiti Komisija za ljudska prava u toku 2004. godine.
- Nakon 31. decembra 2003. godine, Ustavni sud će, u skladu sa svojom nadležnošću propisanom Aneksom 4, odlučivati o novim predmetima koji uključuju zaštitu ljudskih prava.

II Dodatak Pravilima procedure

“Sporazumom u skladu sa članom XIV Aneksa 6 uz Opći okvirni sporazum za mir u Bosni i Hercegovini” takođe se predviđa – u članu (3) – da će, počevši od 1. oktobra 2003. godine, Dom imati dva mala vijeća sastavljena isključivo od domaćih sudaca koji će jednoglasno odlučivati o prihvatljivosti i brisanju prijava.

Radi implementacije ovog dijela “Sporazuma u skladu sa članom XIV Aneksa 6 uz Opći okvirni sporazum za mir u Bosni i Hercegovini” Dom je 6. oktobra 2003. godine usvojio “Dodatak svojim Pravilima procedure”, kojim se uspostavlja dva “mala vijeća” Doma. Ovaj dodatak stupa na snagu 7. oktobra 2003. godine.

III Izmjene i dopune pravila kojima se regulišu zahtjevi za preispitivanje odluka Doma

Štaviše, Dom je usvojio izmjene i dopune svojih Pravila procedure, a rezultat toga je da više nije moguće tražiti preispitivanje odluka o prihvatljivosti i brisanju. Rok za podnošenje zahtjeva za preispitivanje je skraćen na 15 dana. Ove izmjene i dopune takođe stupaju na snagu 7. oktobra.